

Bil. 3

Isnin

23 Julai 2018



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL PERTAMA
MESYUARAT PERTAMA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Isu Banjir di Leba'an**
- *YB. Tuan Oscar Ling Chai Yew (Sibu)*

[Halaman 1]

**MALAYSIA
KAMAR KHAS
PARLIMEN KEEMPAT BELAS
PENGKAL PERTAMA
MESYUARAT PERTAMA**

Isnin, 23 Julai 2018

Mesyuarat dimulakan pada pukul 2.30 petang

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Isu Banjir di Leba'an

2.34 ptg.

Tuan Oscar Ling Chai Yew [Sibu]: Terima kasih Tuan Yang di-Pertua. Saya ingin membangkitkan isu banjir di Leba'an yang telah menghantui penduduk kawasan tersebut selama beberapa tahun. Banjir boleh dikatakan satu fenomena biasa di Sibu kerana lokasinya di kawasan rendah berbanding ke bandar lain di Sarawak. Isu banjir serius terutamanya di kawasan barat Sibu, salah satunya kawasan Leba'an.

Sebab utama banjir kerap berlaku adalah akibat sistem perparitan yang tidak lengkap di kawasan Leba'an. Banyak pintu air yang lama sudah tidak berfungsi. Jabatan Pengairan dan Saliran Sarawak telah melaksanakan projek menubuhkan pintu air yang baru bagi mengatasi banjir di Leba'an. Walau bagaimanapun, pintu air yang baru ditubuhkan nampaknya tidak strategik atau sempurna. Air sungai dari Batang Rejang masih lagi melimpah masuk ke kawasan itu, terutamanya pada musim hujan. Terdapat satu kawasan di Leba'an yang telah menjadi paya kerana pintu air tidak berfungsi. Kawasan tersebut ditakungi dengan air yang tidak dapat mengalir ke mana-mana, menyebabkan pembentukan paya di mana semua pokok buah-buahan dan tumbuhan tenggelam dalam air bertakung, maka kematian pokok-pokok itu.

Kejadian banjir mempengaruhi penduduk di Leba'an dan sebahagian Bawang Assan. Seperti yang disebutkan, banjir mempengaruhi kehidupan harian penduduk, terutamanya bagi mereka yang bergantung pada jualan sayur-sayuran dan buah-buahan sebagai pendapatan hidup. Selain daripada itu, banjir juga menjejaskan pendidikan murid-murid di kawasan tersebut.

Terdapat dua buah sekolah di kawasan terlibat iaitu satu sekolah rendah SK Bawang Assan dan satu sekolah menengah SMK Bawang Assan.

Oleh yang demikian, saya ingin menarik perhatian Yang Berhormat Menteri Air, Tanah dan Sumber Asli untuk mengkaji semula pelan yang strategik dan sempurna bagi mengatasi isu banjir di Leba'an dan Bawang Assan. Sistem perparitan yang lengkap haruslah dikaji dengan teliti bukan sahaja di kawasan Leba'an, tetapi juga termasuk keseluruhan Sibu. Sekian, terima kasih.

2.36 ptg.

Menteri Air, Tanah dan Sumber Asli [Dr. Xavier Jayakumar]: Tuan Yang di-Pertua, terima kasih kepada Yang Berhormat Sibu untuk membawakan perkara ini. Isu banjir yang dibangkitkan oleh Yang Berhormat Ahli Parlimen Sibu adalah melibatkan dua kawasan utama. Satu, kawasan Leba'an dan sebahagian kawasan Bawang Assan yang merupakan kawasan Skim Saliran Pertanian dan kedua, kawasan keseluruhan Sibu terutamanya kawasan perbandaran. Di sini saya hendak beritahu, jarak di antara Leba'an dan Bawang Assan dengan Bandar Sibu adalah dianggarkan 20 kilometer, di antara kedua-dua kawasan ini.

Kawasan Leba'an dan Bawang Assan, banjir berlaku akibat kawasan sekitar yang rendah dan ketika hujan lebat, air sungai melimpahi ban yang rendah. Infrastruktur saluran sedia ada yang tidak lengkap dan tidak berfungsi dengan baik juga menyumbang kepada masalah banjir tersebut. Kawasan ini yang merupakan kawasan Skim Saliran Pertanian, diselenggara oleh pihak kerajaan negeri melalui Jabatan Pengairan dan Saliran (JPS) Negeri Sarawak. Terdapat kerja-kerja membaik pulih dan penyelenggaraan saluran yang dilaksanakan di mana pihak Kerajaan Persekutuan ada membantu membiayai sebahagian peruntukan iaitu sebanyak RM2.06 juta dalam RMKe-10 dan juga RM595 ribu dalam RMKe-11 (2016 hingga 2018).

Bagi langkah jangka panjang untuk menyelesaikan isu banjir dengan lebih berkesan, kementerian akan berusaha untuk memohon peruntukan daripada pihak Kementerian Hal Ehwal Ekonomi dan Kementerian Kewangan bagi melaksanakan kajian lebih terperinci dan projek tebatan banjir di kawasan ini.

Kawasan bandar Sibu. Bagi kawasan bandar Sibu, Kementerian Air, Tanah dan Sumber Asli melalui JPS Malaysia sedang melaksanakan projek Rancangan Tebatan Banjir (RTB) Sibu Fasa 3 dengan kos projek yang diluluskan dalam RMKe-11 sebanyak RM100 juta. Untuk makluman Ahli Yang Berhormat, RTB Sibu Fasa 1 dan Fasa 2 telah siap dalam RMKe-9 dan RMKe-10 dengan kos sebanyak RM215 juta. Untuk RTB Sibu Fasa 4, dengan anggaran kos diperlukan RM361 juta, ia akan dilaksanakan dalam Rancangan Malaysia seterusnya iaitu selepas siapnya fasa 3.

■1440

Saya ada beberapa projek yang telah pun kita laksanakan di bawah RMKe-10 yang siap pada 21 November 2013, *propose upgrading works at Leba'an, Bawang Assan, Blok B, Sibu Division, Sarawak*. Cost dia *is quite high* dan skopnya adalah menaik taraf infrastruktur ban dan parit perimeter sedia ada, pembinaan pintu air, membina *creek closure* dan kerja-kerja berkaitan. Ini sudah siaplah. Tahun 2015 pun kita sudah siap untuk *upgrading works* di Leba'an, Bawang Assan, *control drainage*, membina pintu air, pembinaan struktur pelindung tebing dan juga kerja-kerja berkaitan dengan itu. Ini semua kita telah belanja dekat RM2,060,000 lebih.

Tuan Yang di-Pertua, saya hendak maklumkan di bawah pelan untuk– Dilangsungkan projek atau program untuk *propose maintenance* dalam tahun ini, 2018 di Bawang Assan. Skim ini kita akan belanja kos dia adalah RM100,000. Kerja-kerja penyelenggaraan dalam peringkat ini ialah di dalam peringkat penyelenggaraan sekarang. Itu sahaja Yang Berhormat.

Tuan Yang di-Pertua: Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang hari Selasa, 24 Julai 2018.

[Kamar Khas ditangguhkan pada pukul 2.42 petang]